



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 482/prot.

3

Tiranë, më 29.07.2022

VENDIM

Nr. 901, Datë 29.07.2022

“ MBI AUTORIZIMIN E PËRQENDRIMIT TË PËRKOHSHËM TË REALIZUAR NËPËRMJET BLERJES SË PROPOZUAR TË AKSIONEVE TË SHOQËRISË VISHNUPRIYA FARMS PRIVATE LIMITED NGA SHOQËRIA STATKRAFT IH HOLDINGS AS”.

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar
Z.	Durim KRAJA	Anëtar

Në mbledhjen e tij të datës 29.07.2022, shqyrtoi çështjen me:

Objekti: Autorizimi i përqendrimit të përkohshëm realizuar nëpërmjet blerjes së propozuar të aksioneve të shoqërisë Vishnupriya Farms Private Limited nga shoqëria Statkraft IH Holdings AS.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm mbi njoftimin e përqendrimit të realizuar nëpërmjet blerjes së propozuar të aksioneve të shoqërisë Vishnupriya Farms Private Limited nga shoqëria Statkraft IH Holdings AS.

VËREN SE :

I. Palët në transaksion dhe procedura

Pranë Autoritetit të Konkurrencës është depozituar njoftimi mbi përqendrimin e realizuar nëpërmjet blerjes së propozuar të aksioneve të shoqërisë Vishnupriya Farms Private Limited nga shoqëria Statkraft IH Holdings AS.

Referuar “Marrëveshje për blerje aksionesh” (draft), 02 qershor 2022, palët në marrëveshje janë:

Pala blerëse: Statkraft IH Holdings AS, është një shoqëri, e themeluar sipas legjislacionit të Norvegjisë, me objekt aktiviteti: Veprimtari në fushën e ndërtimit, operimit dhe furnizimit të klientëve me energji të rinovueshme. Statkraft IH Holdings AS është një shoqëri e zotëruar 100% nga Statkraft AS (shoqëria mëmë e fundit), në pronësi të shtetit norvegjez.

Grupi Statkraft është i pranishëm në Shqipëri, nëpërmjet filialeve të zotëruara tërësisht nga shoqëria Statkraft Markets B.V:

Statkraft Renewables Albania SHPK, shoqëri me përgjegjësi të kufizuar, me objekt: Veprimtari studimi, projektimi, ndërtimi, operimi dhe administrimi i impianteve fotovoltaike dhe i sistemeve të lidhura me to, për prodhimin e energjisë nga dielli, riparimi i tyre si dhe mirëmbajtja dhe mbështetja teknike..etj.

Devoll Hydropower SHA, shoqëri aksionare me objekt: Planifikimi, ndërtimi, mirëmbajtja dhe funksionimi i tre njësive prodhuese hidroelektrike me një kapacitet të kombinuar të instaluar përafërsisht 319 MW në Luginën e Devollit përafërsisht midis lartësive 806 dhe 95 metra mbi nivelin e detit si edhe shitja e elektricitetit të prodhuar në Shqipëri dhe jashtë saj.

Shoqëria Target: Vishnupriya Farms Private Limited, është një shoqëri e themeluar sipas legjislacionit të Indisë, shoqëri jo-qeveritare me aksione të kufizuara. Target është një shoqëri që tradicionalisht ka qenë aktive në rritjen dhe shitjen e produkteve bujqësore, por së fundmi ndryshoi modelin e biznesit duke përdorur tokat për prodhim të energjisë solare. Shoqëria është e zotëruar nga Silvergates Holdings and Investments Private Limited (99.9%) dhe një ortak i nominuar (0.1%).

Shoqëria Vishnupriya Farms Private Limited, e mbështetur nga Z. Murali Barathwaj dhe familja e tij, është një shoqëri holding dhe vepron si shoqëri investimi në shoqëri grupi.

Pala shitëse:

Shitësi 1: Silvergates Holdings & Investment Private Limited, është një shoqëri e themeluar sipas legjislacionit të Indisë, shoqëri jo-qeveritare me aksione të kufizuara.

Shitësi 2: Z. Prashanth Krishnan, rezident dhe qytetar i Indisë.

II. Përqendrimi

Referuar dokumentacionit të paraqitur pranë Autoritetit të Konkurrencës dhe Marrëveshje për blerje aksionesh (draft), 02 qershor 2022, rezulton se: Blerësi është i angazhuar në biznesin e ngritjes të termocentraleve duke përfshirë energjinë diellore, të erës dhe hidro në Indi dhe dëshiron të zhvillojë një projekt të energjisë diellore në Tamil Nadu.

Shitësit zotërojnë kolektivisht 100% të të gjithë kapitalit aksionar të emetuar, të nënshkruar dhe të paguar shoqërisë, që nga data e ekzekutimit, të lirë dhe të pastër nga çdo dhe të gjitha barrët. Kuotat do të shiten dhe transferohen tek blerësi së bashku me të drejtat, titullin, interesat, privilegjet të shitësit, të lira nga çdo barrë.

Detyrimi i blerësit për të blerë aksionet e shitjes do të jetë subjekt dhe i kushtëzuar me përmbushjen e secilit prej kushteve paraprahe sipas kërkesës së blerësit. Mbyllja e këtij transaksioni do të bëhet pas plotësimit të veprimeve të përcaktuara në Nenin 6 “Mbyllja”, të marrëveshjes. Nëse palët nuk do të arrijnë mbylljen në ose përpara “Long Stop Date” atëherë kjo marrëveshje do të zgjidhet automatikisht në përputhje me nenin 11 “zgjidhja”, pa përgjegjësi për asnjërën palë.

Pas përfundimit të shitjes dhe blerjes të letrave me vlerë të shitjes në datën e mbylljes, Blerësi do të mbajë 100% të kapitalit aksionar, plotësisht të emetuar të nënshkruar dhe të paguar, të shoqërisë Vishnupriya Farms Private Limited. Transaksioni i propozuar konsiston në blerjen e propozuar të aksioneve në shoqërinë Vishnupriya Farms Private Limited nga shoqëria Statkraft IH Holdings AS, e cila do të bëhet efektive me nënshkrimin e Marrëveshjes dhe plotësimit të Kushteve Paraprake.

Në zbatim të nenit 60 pika 1 të ligjit 9121/2003, pala njoftuese ka kërkuar Autorizimin e Përqendrimit të Përkohshëm deri në momentin e nënshkrimit të marrëveshjes nga palët, duke argumentuar¹ se Statkraft Group është në një periudhë investimi në tregun indian, duke synuar projekte relativisht të vogla, të cilat janë të pajisura më lejet të nevojshme, por që kanë mbetur në vend për mungesë financimesh.

Për shkak se, projektet kanë kapacitet instalimi të ulët në shumë raste, përfshirë projektin në fjalë, nuk ka nevojë për miratim nga Autoriteti i Konkurrencës në Indi dhe as në ndonjë vend tjetër.

Rrjedhimisht, shitësi nisët me prezumimin se transaksioni mbyllet me firmosjen e marrëveshjes dhe pagesën e menjëhershme të çmimit të blerjes. Në rastin e Statkraft, duke qenë një shoqëri globale dhe për shkak të nevojës për miratim nga Autoriteti Shqiptar, Statkraft është e detyruar të vendosë kushte shtesë ndaj shitësit, për të kërkuar kohën e nevojshme nga firmosja e marrëveshjes dhe marrja e miratimit nga Autoriteti i Konkurrencës, në mënyrë që pas plotësimit të këtij kushti, të bëjnë edhe pagesën e çmimit. Blerësit e tjerë potencial në Indi, për të njëjtin projekt nuk e kanë një kusht të tillë dhe tregu indian ka shumë blerës potencial për të blerë projekte të tilla.

Kjo do të thotë se për shkak të shtyrjes në kohë të finalizimit të marrëveshjes dhe arkëtimit nga blerësi të çmimit, Statkraft vihet në disavantazh kundrejt blerësve të tjerë. Në një projekt në muajin qershor, blerësi u tërhoq nga negociimi me Statkraft pikërisht për këtë arsye.

Afatet kohore që kërkohen nga Autoriteti i Konkurrencës për procedurën e kontrollit të një përqendrimi, e vendosin Statkraft në disavantazhin e një investimi të shpejtë, ndërkohë që ka të gjitha fondet në dispozicion për të paguar çmimin e blerjes, duke përfutur kështu nga fakti që ka likuiditete të lira kundrejt blerësve të tjerë, duke dëmtuar planet ekonomike dhe imazhin e kompanisë.

Referuar draft marrëveshjes si dhe pasqyrave financiare të palëve, transaksioni i propozuar përbën një përqendrim në kuptim të nenit 10 dhe 12 të ligjit nr. 9121 datë 28.07.2003 “Për mbrojtjen e konkurrencës” dhe si i tillë është objekt autorizimi nga Komisioni i Konkurrencës.

Shoqëria blerëse, Statkraft IH Holdings AS, është një shoqëri e zotëruar 100% nga Statkraft AS, shoqëria mëmë e Grupit Statkraft, e cila është prezente në Shqipëri përmes dy filialeve të saj, Statkraft Renewables Albania SHPK dhe Devolli Hydropower SH.A.

Shoqëria target, Vishnupriya Farms Private Limited, është një shoqëri e regjistruar në Indi, aktive në prodhim të energjisë solare, e cila nuk është prezent dhe nuk realizon të ardhura në Shqipëri. Aktiviteti i tij fokusohet në Indi. Blerja e tij është thelbësore në ngritjen e një projekti të dytë solar në Tamil Nadu.

¹ Shkresa nr. 492/2 prot.AK datë 28.07.2022 “Argumente në vijim të shkresës nr. 492 datë 20.07.2022”

Përqendrimi i njoftuar nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshim dhe nuk do të ketë ndikim në tregun shqiptar.

Për sa më sipër, bazuar nën 60 të ligjit nr. 9121, datë 28.07.2003 “Për mbrojtjen e konkurrencës” dhe në kërkesën e palës njoftuese për pajisjen me autorizim të përqendrimit të përkohshëm, Autoriteti i Konkurrencës gjykon të nevojshëm dhënien e autorizimit të përqendrimit të përkohshëm deri në depozitimin e marrëveshjes së nënshkruar nga palët pjesëmarrëse në transaksion.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 dhe të nenit 60 pika 2 të ligjit nr. 9121, datë 28.07.2003 “Për mbrojtjen e konkurrencës”,


VENDOSI:


1. Të autorizojë përkohësisht përqendrimin e realizuar nëpërmjet blerjes së propozuar të aksioneve të shoqërisë Vishnupriya Farms Private Limited nga shoqëria Statkraft IH Holdings AS.
2. Autorizimi i përqendrimit të përkohshëm do të jetë i vlefshëm deri në momentin e nënshkrimit të marrëveshjes nga palët në transaksion.
3. Pala njoftuese ka detyrimin të depozitojë pranë Autoritetit të Konkurrencës, marrëveshjen e nënshkruar nga palët pjesëmarrëse në transaksion, pas të cilës Sekretariati do të fillojë procedurën e kontrollit të përqendrimeve bazuar në nenet 53-64 të ligjit nr. 9121 datë 28.07.2003 “Për mbrojtjen e konkurrencës”.
4. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.


Ky vendim hyn në fuqi menjëherë.

KOMISIONI I KONKURRENCËS

Leida MATJA
()
Zv/Kryetar

Rezana KONOMI
()
Anëtar

Adriana BERBERI
()
Anëtar

Durim KRAJA
()
Anëtar

Dënar BIBA
()
Kryetar

